

risguard. Esser ensemen sin via – ina semeglia per la veta. Ella secunda notg eis ei ruaus da l'ina. Negins apparats pigns ein pli activs – en mintgacass buca udibels. Rimnar ils telefonins ei questa notg negin tema. Forsa dat ei aunc discuors, quei sauda vitier.

La sien sa vegnir cumpensada a casa.

Da solver ein tuts punctuals. La bagascha ei semtgada, ils batlinis e tapets ein tratgs giu e cavigliai. Il parcoavventura, in percours da reiver sin sugas aultas vegn aunc absolvius.

Ella lingia directa da Bellinzona a Cuera diermel jeu in tec egl auto da posta e sedamondel: Nua savessen nus ir igl onn che vegn?

Zenns da Flond

Gliendisgis ils 22 e margis ils 23 d'october vegnan ils zenns da Flond puspei mess si. Entochen lu dat ei naturalmein negin tuchiez.

Marenda a Pitasch el „gat ner“

Margis ils 6 da november ed ils 4 da december allas dudisch.

Lavurs dalla casa pervenda Luven ein ventschidas

Ils 11 da november suenter priedi envida la suprastonza e la famiglia Merkel, da dar in'egliada sillas midadas e renovaziuns ella casa pervenda.

Cantar egl advent

Margis ils 12 da december allas 16.00 uras ella baselgia da Luven

Clarinetta ed orgla

Margis ils 27 da december allas 20.00 uras ella baselgia da Luven vegnan René Oswald, clarinetta e Martin Rabensteiner, orgla puspei a sunar.

La Panera – in necrolog

„Panera“, per tudestg „Brothänge“, ei in surnum dil pli ault pégn „Picea abies“ dalla Svizra. „Panera“ senumna el, perquei che sia formaziun dalla roma vesa ora sco ina panera.

La forza speciala dalla Panera: In resultat dalla grascha da cauras e nuorsas, ch'ei serimnada sil punct il pli bass dapi tschentaners. Bual era pastira – naven dils temps primars. La panera ei carschida en in liug cul meglier nutriment.

La preit crap damaneivel po forse haver funcziunau sco protecziun.

In bellezza exemplar era ella. Tgei vegn a daventar ord siu tgierp miert da lenn?

Ina sculptura? In baun? Lenna da brisch?

La fin da quella plonta regorda mei vid in vers, che setracta dil temps d'advent e Nadal

„Ord il best dad Isai crescha ina frastga, ord sia cuscha catscha in cagl.“ (Jes 11,1). La fin dad ina caussa dumonda suenter l'entschatta. Tgei vegn a crescer da niev?

Isai era in um el vegl Israel, che avdeva a Bethlehem. In che veva biars ferms fegls. Cu il profet Samuel vegn tier el, per encurir il niev retg, sto el sedumandar atras tochen il pli giuven, per anflar quel che dueigi vegnir retg: David, in pign buob, il caverer da Bethlehem. Samuel, il profet, ha in'ureglia speciala per il meini da Deus.

Il temps da David e da sia pussonza ei dagitg vargaus, cu il profet discuora dil best. Ina nova entschatta annunzia el, puspei ord il medem best, il best dad Isai a Bethlehem, denton niev. In niev retg, in niev feagl da David.

Il tschiec agl ur dalla via spitgava era sin quel: „Jesus, feagl da David, hagues cumpassiun cun mei!“

Lein patertgar vidlunder: La Panera era mo ina plonta, denton ina speciala. Ella regorda vid in impurtont passadi dalla bibla.

„Ord il best dad Isai crescha ina frastga...“. Ina cuscha ei mai mo ina fin.

Albrecht Merkel

